

Bunas prestaziuns dils Sursilvans a Spligia

Il curriders sursilvans ein returnai cun plirs rangs da podest dils campjunadis grischuns da cuorsa liunga dalla fin d'jamna a Spligia. Ella cuorsa singula dil stil liber la sonda ha *Otavia Vonplon* dil Club da skis Castrisch contonschiu il dieschavel rang ella categoria dallas mattatschas sut 12 onns. Ella medema categoria da vegliadetgna dils buobs ei *Elia Bisquolm* dil Club da skis Trun daventaus quart. In bi success han ils Sursilvans festivau ella categoria dils mattatschs sut 14 onns. *Tylan Michel* dall'OG Trin ha acquistau il tetel da campjun grischun e *Heikki Piali*, medemamein OG Trin, ei daventaus tierz. En quella categoria ei *Maurin Schmed* da Selva Sagogn daventaus dieschavel. *Matia Friberg* dil Club da skis Sedrun-Tujetsch ha contonschiu il siatavel megljer temps ella categoria dils mattatschs sut 16 onns. In rang da podest – numnadamein il tierz – ha il currider tuatschin *Jon-Fadri Nufer* realisau ella categoria dils umens sut 18 onns. Tiels umens ei *Cla-Ursin Nufer* daventaus sisavel, campjun grischun dils umens ei *Toni Livers* (Tavau/Trun) daventaus.

El team-sprint ch'ei staus sil program la dumengia ha Castrisch cun *Otavia Vonplon* ed *Elena Peng* contonschiu il quart rang tier las mattatschas sut 12 onns. Quei ei stau il sulet team sursilvan ch'ei staus alla partenza. Il campjunadis grischuns ein vegni arranschai dil Club da skis Tambo Spligia. (fmr/hh)